

**Stipendianik tallimanik ukiut tamaasa Aningaasanut Inatsit aqutigalugu
ilisimatuussutsikkut misissuinernut qinnutigineqarsinnaasunik atugassanik kiisalu
Kalaallit Nunaanni namminerisamik ilisimatuussutsikkut siunnersuisoqatigiinnik
peqalernissamik siunnersuummik saqqummiussaqaarnissaannik Inatsisartut
peqquneqaarnissaannik siunnersuut**

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
ataatsimiititaliap**

ISUMALIUTISSIISUTAA

Aalajangiiffigissassatut siunnersuutip aappassaaneerpeqarnissaanut tunniunneqartoq

Kultureqarnermut-, Ilinniartitaanermut-, Ilisimatusarnermut Ilageeqarnermullu
ataatsimiititaliap suliarinninnermini ukuninnga inuttaqarpoq:

Juliane Henningsen, Inuit Ataqatigiit

Harald Bianco, Inuit Ataqatigiit

Andreas Uldum, Demokraatit

Malik Berthelsen, Siumut

Naja Petersen, Atassut

Jens Immanuelson, Malik Berthelsenimut sinniisussa, Siumut

Kultureqarnermut-, Ilinniartitaanermut-, Ilisimatusarnermut Ilageeqarnermullu
ataatsimiititaliap UKA09-mi ulloq 6. november 2009 siullermeerinninnerup kingorna
siunnersuummik misissuataarinnippoq.

1. Siunnersuutip imarisaa

Kalaallinik ilisimatuunnik ineriartortitsinissaq tapersorsorniarlugu immikkut ittumik ph.d.
stipendianik tallimanik aningaasaqarnermut inatsimmit aningaasaliisoqaarnissaa
siunnersuuteqartup kissaatigaa. Kalaallit Nunaata arlaannaannulluunniit atanngitsunut
ilisimatusarneq pillugu siunnersuisoqatigiinnik peqalernissaa nammineq nunagisami
ilisimatusarneq qulakkeerniarlugu tassunga ilanngullugu siunnersuuteqartumit
kissaatigineqarpoq.

2. Siunnersuutip aningaasaqarnikkut kinguneqaatissai

Siunnersuut qanoq aningaasalersorniarneqaarnersoq siunnersuuteqartumit taaneqaangilaq.

Naalakkersuisut akissuteqaamminni ilisimatitsissutigaat, ph.d. stipendiamut ataatsimut ukiuni pingasuni ingerlanneqartartumut 3 millioner kronit missaanik akeqartartoq. Ilisimatitsissut taanna aallaavigissagaanni ima isumaqarpoq stipendiat tallimat aningaasalersorneqarnissaat ukiumut 5. mill kr.-inik pisariaqartitsissammat, tassa imaappoq ilisimatuut tallimat ukiuni pingasuni ilinniarnissaat katillugit 15 millioner kroninik akeqassaaq.

Arlaannaannulluunniit attummassuteqanngitsunut ilisimatusarneq pillugu siunnersuisoqatigiit pilersinneqarneranni aningaasartuutissat pillugit ataatsimiititaliamit tamanna nalilerneqarsinnaanngilaq.

Taamaattorli aningaasartuutissat appasinnerunissaat ilimagineqarsinnaassaaq ilisimatusarneq pillugu siunnersuisoqatigiit allaffissornermi immikkoortut qinnuteqaatinik ataqatigiissaarisussatut inissisimamata pissutigalugu. Aammattaaq ilimagineqartariaqassaaq ilisimatusarneq pillugu siunnersuisoqatigiinni ilaasortat akissarsiaasaannut aningaasartuuteqarnissaq.

3. Inatsisartuni siullermeerinninnermi siunnersuutip nalilerneqarnera

Naalakkersuisut inassutigaat siunnersuut itigartitsissutigineqassasoq, siunnersuutip imarisai piviusunngortinniarlugit Naalakkersuisut suliniutinik aallartitsereernikummata.

Naalakkersuisut ilisimatitsissutigat, ilisimatusarneq pillugu politikissaq pillugu nalunaarusiassami naatsorsuutigineqarmat:

”... Nunatsinni ilisimatusarneq pillugu siunnersuisoqatigiinnik pilersitsinissap kaammattuutigineqarnissaa Naalakkersuisut naatsorsuutigaat. Tamatuma saniatigut ilisimatusarnermi politikikkut nassuiaammi Ph.d stipendiat amerlanerunissaat pisariaqartinneqarnerisooq, ilinniartut qassit pilerilersinneqarsinnaanersut, kiisalu ilisimatusarnermik ilinniartitaanermut aningaasalersuinerup iluaqutissartai naliliiffigineqassapput. Nassuiaatip Inatsisartut 2010-mi ukiakkut ataatsimiinneranni saqqummiunneqarnissaa pilersaarutaavoq tassanilu inassuteqaatit 2011-mut siumullu Aningaasanut Inatsisissatut Siunnersuusiornermut atatillugu tulleriarinermi ilaatinneqassapput. Nassuiaat nunatsinni ilisimatusarfeqarfii isumasioqatigalugit suliarineqassaaq”.

Siunnersuut **Inuit Ataqaqatigiinnit** taparserneqarpoq Naalakkersuisullu siunnersuummut naapertuuttumik suliniutinik aallartitsereersimasut maluginiarlugu.

Naalakkersuisut akissuteqaataat **Siumumit** tusaatissatut tiguneqarpoq ilisimatuutullu ilinniartitaanerup pilersinneqarnissaanut Naalakkersuisut aningaasaliissutinik amerlanerusunik nassaarniarlutik sulinerat nuannaarutigalugu.

Demokraatit siunnersuut taperserpaat taamaattorli qanoq aningaasalersorneqarnissaata qulaajarneqarnissaa kissaatigalugu.

Siunnersuutip Naalakkersuisullu anguniagaat imminnut naapertuummata **Atassut** isumaqarpoq aningaasalersuinissarlu AIS 10-imut ilanngunneqaqqullugu Naalakkersuisunut kaammattuutigalugu.

Kattusseqatigiit Partiiata siunnersuut tapersersunngilaa 2011-imi ukiaanerani ataatsimiinnissamut ilisimatusarneq pillugu naalakkersuinikkut nalunaarusiortoqarnissaanik saqqummiussisoqarnissaa Naalakkersuisut ilisimatisissutigisimasaat innersuussutigalugu.

4. Ataatsimiititaliap siunnersuummik suliarinninnera

4. 1. Arlaannaannulluunniit attuumassuteqanngitsunut Ilisimatusarneq pillugu siunnersuisoqatigiinnik pilersitsineq

Siunissami Kalaallit Nunaanni ilisimatusarnerup siunnerfigisassaa pillugu KVUG aalajangiisuusumik oqartussaanaera pissusissamisoornersoq aalajangiiffigisassatut siunnersuutip tunngavilersuutaa pillugu siunnersuuteqartoq apeqquteqarpoq. Uagut nammineerluta ilisimatusarneq pillugu siunnersuisoqatigiinnik peqartariaqalinnginnerluta.

KVUG (Kalaallit Nunaanni ilisimatuut misissuinerat pillugu Ataatsimiititaq) tassaavoq kalaallit Ilisimatusarnermut Naalakkersuisuannut kiisalu danskit ilisimatusarnermut ministeriata danskit kalaallillu ilisimatusarnikkut suleqatigiinnerannut apeqqutini siunnersuisutut inissisimasoq.

KVUG siulittaasoq siulittaasullu tullia ilanngullugu aqqaneq marlunnik ilaasortaqqarpoq. Taakku kalaallit Ilisimatusarnermut Naalakkersuisuannit kiisalu danskit ilisimatusarnermut ministerianit ataatsimut toqqarneqartarput. KVUG-ip maannakkut Minik T. Rosing siulittaasoraa kiisalu Daniel Thorleifsen siulittaasumut tulliulluni. Ilaasortanit allanit taaneqarsinnaasut tassaapput Anna Heilmann, Naja Mikkelsen, Gert Mulvad, Carl Christian Olsen, Hans Christian Olsen kiisalu Helle Siegstad.

Soorlu takuneqarsinnasoq soorlu aamma Danmarkimi taamaattoq KVUG tassaavoq Kalaallit Nunaata ilisimatusarnikkut ataatsimiittartoqatigiivi taamaammallu kalaallinut attuumassuteqartunik amerlanerusunik ilaasortaqarluni.

Kalaallit Nunaata Danmarkillu akornanni ilisimatusarnikkut suleqatigiinnerigallagaa KVUG-ip suliassaqarfignaa, kiisalu ph.d. stipendianik KVUG-ip ataani toqqaasarneq aningaasaleeqatigiilluni stipendianik taamaallat imallit – tassa stipendiat Kalaallit Nunaata Danmarkillu kattullutik akilertagaat, taamaattorli Kalaallit Nunaat pingajorarterutaannarmik akiliisarluni.

Arlaannaanulluunniit attuumassuteqanngitsunut ilisimatusarnikkut ataatsimiittartoqatigiit pillugit siunnersuummut Ataatsimiititaliaq ima paasinnippoq, siunnersuuteqartumit kissaatigineqarmat Kalaallit Nunaanni ilisimatusarnikkut siunnersuisoqatigiinnik pilersitsisoqassasoq, Kalaallit Nunaata Danmarkillu akornanni ilisimatusarnermut ilaanngitsumik, ilaatigut kalaalinnarnit aningaasalersorneqartunik ph.d. stipendianik stipendiatinik toqqaasartussanik.

4. 2. Stipendianut tallimanut immikkut tapiissutit

Siunnersuutip oqaasertai malillugit ph.d. stipendianut immikkut tallimanut suli tapiissuteqartoqassaaq. Oqaaseq ”tapiissut” naliginnaasumik atorneqartarpoq tamakkiisumik aningaasalersuisoqartinnagu. Taamattorli siunnersuummi takuneqarsinnaanngilaq aningaasartuutit ilaat qanoq amerlatigisut Namminersorlutik Oqartussanit akilerneqartassanersut imaluunniit aningaasartuutit sinneruttui kiap akilertassanera.

Periarfissaq alla taassaasinnaavoq stipendianik amerlassusaasa annertusineqarnissaat pillugu danskit naalakkersuisuinik isumaqatigiinniarnissaq. Taamaattorli siunnersuutip ilagisaanut ilisimatusarnermut siunnersuisoqatigiinnik kalaaliinnarnik inuttaqartumut tamanna naapertuuppallaanngilaq.

Naalakkersuisut aningaasalersueqataanissamut allanik periarfissanik nassaarsinnaanngippata aningaasartuutit tamarmiusut aningaasanut inatsimmit matussuserneqartariaqassapput. Soorlu taaneqareersutut Naalakkersuisut nalilerpaat tamanna ukiumut 5 mio. kr-inik aningaasartuuteqarfiussasoq.

4.3 Ataatsimiititaliaq naliginnaasumik eqqarsaasersuutai

Kalaallit Nunaata namminerisaminik ilisimatuunik nunatsinni ilinniarsimasunik peqalernissaata nukittorsarneqarnissaa pingaaruteqartoq siunnersuuteqartutulli ataatsimiititaliaq isumaqarpoq. Kalaallit Nunaannit aallaaveqartumit pigiinnarneqartussamillu

ilisimatuussutsikkut peqalernissamik pilersitsisoqarnissaa qulakkeerneqarnissaalu Kalaallit Nunaanni inuiaqatigiinnut iluaqutaasussanik ilisimatuut nunatsinni ilinniagaqarsimasut amerlanerit peqataaffigissagaat Ataatsimiititaliaq isumaqarpoq.

2010-imi ukiaanerani ataatsimiinnissami ilisimatuussutsikkut naalackersuinikkut nalunaarusiortoqarnissaa saqqummiunneqassasoq taamaalillutillu inassuteqaatit AIS 2011-imut siunissamullu suliarininnermut atatillugu pingaarnersiuiinnermut ilanngunneqarsinnaasut Naalackersuisunit ilisimatitsissutigineqartoq Ataatsimiititaliap maluginiarpaa. Aammattaq Naalackersuisut ilisimatitsissutigaat, nalunaarusiaq suliarineqarumaartoq Kalaallit Nunaanni ilisimatusarfiit isumasioqatigalugit. Kalaallit Nunaanni ilisimatusarfiit ilisimatusarneq pillugu naalackersuinikkut nalunaarusiap suliarineqarnerani sunniuteqarnissaat Ataatsimiititaliap pissusissamisoorluinnartutut isigaa.

Ilanngulluguttaaq ataatsimiititaliap maluginiarpaa AIS 10-imi takuneqarsinnaammat, maannakkorpiaq ilinniagaqartut qulingiluat sammisanut Kalaallit Nunaannut attuumassuteqartumik ilisimatusarnermik ilinniakkamik ingerlataqarmata.

Qulaani taaneqartut eqqarsaatigalugit aningaasaliissutinillu sukannersumik pingaarnersiuinissamik pisariaqartitsineq aallaavigalugu siunnersuummik piviusunngortitsinissaq ilisimatusarneq pillugu naalackersuinikkut nalunaarusiassaq utaqqimaarneqartariaqaraluartoq Ataatsimiititaliamit nalilerneqarpoq.

5. Ataatsimiititaliap inassuteqaataa

Siunnersuut taama oqaaseqaasertalersorneqartoq itigartitsissutigineqarnissaa

Ataatsimiititaliap isumaqatigiittup inassutigaa.

Taamatut oqaaseqarluni ataatsimiititaliap siunnersuut aappassaaniigassanngortippaa.

Juliane Henningsen

Siulittaasoq

Harald Bianco

Siulittaasup tullia

Andreas Uldum

Malik Berthelsen

Naja Petersen